

## VINI

Dépi granmatin nana kom in mistèr dann lézèr. In sièl bagasé, lour kom lo ros, la étann son palto noir si la foré. Lo van dann piédboi la anmélé, i ri san kari. Dann linpasians, la tèr i atann la pli i douy pou vréman.

Alonzé, mi san tangaz lo monn. I pran amoin pou in fou. I poz késtion. Fo fé sanblan.

Vini, dans ! Moin la oubli viv. Son pié i apiy si mon poumon. Moin la arèt réspiré. Ô Vini, dans, dans ankòr !

Vini, in ti-non i sort dann néan, i aparèt dinkou la nuit pou sirpran amoin dann rèvman demi-konsian.

Mi agard koté gos : Ala Vini. A droit... Ô Vini ! Èl i sant. Mi bour mon tèt dann zoryé. Vini i sant la rond, la filas mon bann nèr i rédi. Moin la oubli la minit, moin la inior lèr.

Mi tourn amoin si in koté, lo li i grins. Vini lé là. Mi avans mon min. Vini lé pi là ! Mi avans, mi avans minm... Vini, Vini.

Dann fénoir mi rèv Vini, mon dé min sou la tèt, mon fron anvayi par la fièv. Viniiii... Mi kouine kom ti-baba dann son somèy.

Apréla in kok la santé. Apréla dé, troi, kat. Apréla tout bann kok la santé, té i fé zapèl rant zot d'in bout la tèr a lot, tèlman pré, tèlman loin, moin lavé lèv avan zot.

La pli i farine. Ô Vini ! Mi fé sanblan fèrm lézié. Mi san solèy rant dann la sanm, ranp si karpèt, frol la pat lo li. I mont si moin astèr, si mon zanm, i tard si mon kuis, rant mon kuis. I pèz si mon vant, i glis si mon pèktoro, i ardsann si mon bra avan kouvèrt mon figir.

Gro-féklèr lé là. Ô Vini ! Gro-féklèr-là i fé sort amoin dann demi-rèv de ou pou fé voltiz amoin dann la pousièr koko do-